

四庫全書

史部

欽定四庫全書

史部

欽定續通典卷十一

詳校官監察御史_臣曹錫寶

洗馬_臣王坦修覆勘

校對官檢討_臣徐準

謄錄監生_臣沈桐

欽定四庫全書

欽定續通典卷十一

食貨

錢幣上

唐

五代

宋

唐肅宗上元元年詔曰因時立制頃議新錢且是從權知非經久如聞官鑪之外私鑄頗多吞併小錢踰濫成弊抵罪雖衆禁奸未絕況物價益起人心不安事藉變通期於折衷其重稜五十價錢宜減作三十文行用其

開元舊時錢宜一當十文行用其乾元十當錢宜依前行用仍令中京及畿縣內依此處分諸州待進止尋勅重稜五十價錢先令畿內減至三十價行其天下諸州並宜準此又詔應典貼莊宅店舖田地碾磴等先為實錢典貼者令還以實錢贖先以虛錢典貼者令虛錢贖

其餘交關並依前用給賞價錢

由是錢有虛實之稱

寶應元年

時代

宗已即位

改行乾元錢一以當三乾元重稜小錢亦以一當

二重稜大錢一以當三尋又改行乾元大小錢並以一

當一其私鑄重稜大錢不在行用之限人甚便之其後
破錢鑄器不復出矣時諸道鹽鐵轉運使劉晏以江嶺
粗賤之貨積之江淮易銅鉛薪炭廣鑄錢歲得十餘萬
緡輸京師及荆揚二州代宗大歷四年關內道鑄錢等
使戶部侍郎第五琦請於絳州汾陽銅原兩監增置五
鑪鑄錢許之七年禁天下新鑄造銅器唯鏡得鑄其器
舊者不得貨鬻德宗建中元年戶部侍郎韓洄上言江
淮錢監歲共鑄錢四萬五千貫輸於京師度工用轉送

之費每貫計錢二千是本倍利也今商州有紅崖冶出銅益多又有洛源監久廢不理請增工鑿山以取銅興洛源錢監置十鑪鑄之歲計出錢七萬二千貫度工用轉送之費貫計錢九百則利浮本也其江淮七監請皆停罷又天下銅鐵之冶是曰山澤之利當歸於王者非諸侯方岳所宜有今諸道節度都團練使皆占之非宜也請總隸鹽鐵使皆從之二年諸道鹽鐵使包估奏江淮百姓近日市肆交易錢多粗惡揀擇納官者三分纔

有二分餘並鉛錫銅盪不數斤兩致使絹價騰貴惡錢漸多訪聞諸州山野地窖皆有私錢轉相貿易奸濫漸深今後委本道觀察使明立賞罰切加禁斷貞元初禁錢出駱谷散關九年張滂奏諸州府公私諸色鑄造銅器雜物等伏以國家錢少損失多門興販之徒潛將銷鑄錢一千為銅六斤造寫器物則斤直六百餘其利既厚銷鑄遂多江淮之間錢實減耗伏請準從前勅文除鑄錢外一切禁斷又禁陌內欠錢時商賈至京委錢諸

道進奏院及諸道諸使以輕裝趨四方合券乃取之號

飛錢

元和四年禁之後民有滯藏物價浸輕判度支盧坦請許於戶部度支鹽鐵三司飛錢每千錢增給

百錢然商人無至者

又禁賣劍銅器天下有銅山任人採取其銅

官買除鑄鏡外不得鑄造十年勅鑄造銅器不須禁止其每斤買賣價直不得過一百六十文如有銷錢為銅者以盜鑄錢罪論十四年鹽鐵使李若初奏諸道州府多以近日泉貨數少繒帛價輕禁止見錢不令出界致使課利有闕商賈不通請指揮見錢任其往來勿使禁

止從之憲宗元和元年以錢少禁用銅器二年禁鉛錫
錢三年鹽鐵使李巽以郴州平陽銅坑二百八十餘井
以兩鑪日鑄錢二十貫一年鑄成七千貫有益于人從
之時天下歲鑄錢十三萬五千緡又詔曰泉貨之法義
在通流若錢有所壅貨當益賤故藏錢者得棄人之急
居貨者必損已之資今欲著錢令以出滯藏加鼓鑄以
資流布使商旅知禁農桑獲安義切救時情非欲利若
革之無漸恐人或相驚應天下商賈先蓄見錢者委所

在長吏令收市貨物官中不得輒有程限逼迫商人任其貨易以求便利計周歲之後此法通行朕當別立新規設蓄錢之禁所以先有告示許其方圓意其他時行法不貸又天下有銀之山必有銅鑛銅者可資于鼓鑄銀者無益于生人權一重輕使務專一其天下自五嶺以北見採銀坑並宜禁斷採銀一兩者流他州官吏論罪

按韓愈錢重物輕狀云五嶺買賣一以銀元微之錢貨議狀自嶺以南以金銀為貨幣其時天下惟用錢

白金尚未通行也

四年京師用錢緡少二十文陌內欠錢及有

鉛錫錢者捕之勅五嶺以北所有銀坑依前任百姓開採禁見錢出嶺六年詔貿易錢十緡以上參用布帛河東節度使王鐸奏請于當管蔚州界加置鑪鑄銅錢廢管內錫錢許之仍令加至五鑪七年詔令度支量支錢三萬貫充蔚州鑄錢本復詔曰錢重物輕為弊頗甚詳求適變將以便人所貴緡償通行里閭寬息宜令百寮各隨所見作利害狀以聞八年以內庫錢五十萬貫令兩市收市布帛每端匹估加十之一時兵興七道經費

屈竭皇甫鑄建議内外用錢每緡墊二十外復抽五十
送度支以贍軍十二年復給京兆府錢五十萬緡市布
帛而富家錢過五千貫者死王公重貶沒入于官以五
之一賞告者京師區肆所積皆方鎮錢少亦五十萬緡
乃爭市第宅然富賈倚左右神策軍官錢為名府縣不
敢劾問民間墊陌有至七十者鉛錫錢益多十四年勅
時用錢每貫除二十文足陌內欠錢有鉛錫者宜令京
兆府枷項收禁穆宗即位京師鬻金銀十兩亦墊一兩

糴米鹽百錢墊七八長慶元年以所在用錢墊陌不一
詔從俗所宜內外給用每貫一例除墊八十以九百二
十文成貫不得更有加除及陌內欠少戶部尚書楊於
陵曰王者制錢以權百貨貿遷有無變通不倦使物無
甚貴甚賤其術非他在上而已何則上之所重人必從
之古者權之于上今索之于下昔散之四方今藏之公
府昔廣鑄以資用今減鑪以廢功昔行之於中原今洩
之於邊裔又有閭井送終之哈商賈貸舉之積江湖壓

覆之耗則錢焉得不重貨焉得不輕開元中天下鑄錢七十餘鑪歲盈百萬今纔十數鑪歲入十五萬而已大歷以前淄青太原魏博雜鉛鐵以通時用嶺南雜以金銀丹砂象齒今一用泉貨故宜不足今宜天下兩稅權酒鹽利上供及留州送使錢悉輸以布帛穀粟則人寬于所求然後出內府之積收市廛之滯廣山鑄之數限邊裔之出禁私家之積則貨日重而錢日輕矣敬宗寶歷元年河南尹王起請銷錢為佛像者以盜鑄錢論制

可文宗太和三年中書門下奏元和四年勅應有鉛錫錢並令納官如有人紕得一錢賞百錢當時勅條貴在峻切今詳事實必不可行宜立節文今可遵守臣等商量自今已後有用鉛錫錢交易者一貫已下州府常行杖決脊杖二十十貫已下決六十徒三年過十貫已上集衆決殺其受鉛錫錢交易者亦準此處分其所用鉛錫錢並納官其能紕告者每一貫賞錢五十不滿一貫者準此詔可之四年詔積錢以七千緡為率除合貯數

外一萬緡至十萬緡者期以一年出之十萬至二十萬者以二年凡交易百緡以上者匹帛米粟居半河南府揚州江陵府以都會之劇約束如京師未幾皆罷五年鹽鐵使秦湖南管内諸州連接嶺南山洞深邃百姓依模監司錢樣競鑄造到脆惡姦錢轉將賤價博易與好錢相和行用其江西鄂岳桂管鑄濫錢並請委本道觀察條疏禁絕詔從之八年河東錫錢復起鹽鐵使王涯置飛狐鑄錢院于蔚州天下歲鑄錢不及十萬緡時文

宗病幣輕錢重詔方鎮縱穀交易時雖禁銅為器而江淮嶺南列肆鬻之鑄子錢為器售利數倍宰相李珣請加鑪鑄于是禁銅器官一切為市之天下銅坑五十歲采銅二十六萬六千斤武宗會昌六年二月勅緣諸道鼓鑄佛像鐘磬等新錢已有次第須令舊錢流布絹帛價稍增文武百寮俸料宜起三月一日並給見錢其一半先給虛估匹段對估價支給勅比緣錢重幣輕生人坐困今加鼓鑄必在流行通變救時莫切于此京城及

諸道起今年十月以後公私行用並取新錢其舊錢權
停三數年如有違犯同用鉛錫惡錢例科斷其舊錢並
納官事竟不行復廢浮屠法永平監官李郁彥請以銅
像鐘磬鑪鐸皆歸巡院州縣銅益多矣復許諸道皆得
置錢坊淮南節度使李紳請天下以州名鑄錢京師為
京錢大小徑寸如開元通寶交易禁用舊錢會宣宗即
位盡革會昌之政新錢復鑄為像昭宗末京師用錢八
百五十為貫每陌纔八十五河南府以八十為陌哀帝

天祐二年勅每貫抽除外以八百五十文為貫每陌八十五文聞坊市多以八十為陌更有除折今後委河南指揮市肆交易並須以八十五文為陌

後唐莊宗同光二年詔曰錢者古之泉布蓋取其流行天下布散人間無積滯則交易通多貯藏則士農困故西漢興改幣之制立告緡之條所以權蓄賈而妨大奸也宜令所司不得令富室分外收貯見錢又工人銷鑄為銅器兼沿邊州鎮設法鈐轄勿令商人搬載出境知

唐州駢晏平奏市肆間點檢錢帛內有錫蠟小錢揀得不少皆是江南網商挾帶而來詔曰泉布之幣雜以鉛錫惟是江湖之外盜鑄尤多市肆之間公行無畏因是網商挾帶舟楫往來換易好錢藏貯富室實為蠹弊須有條流宜令京城諸道于坊市行使錢內點檢雜惡鉛錫並宜禁斷沿江州縣每有舟船到岸嚴加覺察若私載往來並宜收納明宗天成元年勅諸道州府及諸城門所出見錢如五百以上不得放出至行使銅錢不得

挾帶蠟錢如違其所使錢不限多少並納入官仍科深
罪二年度支奏三京諸道買賣見錢舊有條流每陌八
十文近市肆人戶皆將短陌轉換長錢若不條約轉啟
俸門請指揮買賣並須使八十陌錢從之時銅器貴市
人多銷錢為器及以鐵蠟鉛錫錢夾用廢帝時屢禁之
終不能行

晉高祖天福三年詔曰國家所資泉貨為重令三京鄴
都諸道州府曉示無問公私應有銅者並許鑄錢仍以

天福元寶為文左環讀之委鹽鐵使鑄樣頒下諸道令
每一錢重二銖四參十錢重一兩仍禁以鉛鐵鑄造雜
亂銅錢凡久廢銅冶處許百姓取便開鍊官中不取課
利除鑄錢外不得接便別鑄銅器尋以逐處銅闕難依
先定銖兩令天下有銅欲鑄錢者取便酌量輕重鑄造
不得入錫并鐵及缺漏不堪久遠用使四年勅今後祇
官鑄錢私下禁復建泉鑪于藥州為石豹冶

漢隱帝時三司使王章征利剥下緡錢出入原以八十

為陌章每出錢陌必減其三始使七十七陌錢時膳部
郎中羅周允上言曰錢刀之貨古今通行從古自來鑄
造不息長無積聚蓋被銷鎔若不峻設隄防何以絕其
奸宄臣請勅三京鄴都諸道州府凡器物服玩民間百
物舊有銅者今後禁斷不得用銅諸郡邑州府鄺市已
成銅器及腰帶幘頭線及門戶飾許勅出後一月並令
納官官中約定銅價支給候諸處納畢請在京置鑪鑄
錢俾銅盡為錢以濟軍用除錢外只令鑄鏡其餘並不

得用銅疏奏不報

周太祖廣順元年勅銅法今後官中更不禁斷一任興
販所有一色即不得瀉破為銅器貨賣如有犯者有人
糾告所犯人不計多少斤兩並處死其地方所由節級
徒三年鄰保人杖七十其告事人給與賞錢一百貫世
宗顯德二年勅國家之利泉貨為先近朝以來久絕鑄
造至于私下不禁銷鎔歲月漸深奸弊尤甚今採銅興
冶立監鑄錢冀便公私宜行條制起今後除朝廷法物

及火珠鈴鐸其餘一切禁斷應兩京諸道所有銅器限
勅到五十日內並須毀折送官所納到銅據斤兩給價
如出限及有隱藏五斤以上處死一兩至五斤罪各有
差初以高麗地產銅銀遣尚書水部員外郎韓彥卿以
帛數千匹市銅于高麗以鑄錢六年其王高昭遣使者
貢黃銅五萬斤

南唐元宗既失江北困于用兵鍾謨請
鑄大錢以一當十曰永通泉貨未幾廢

時韓熙載又鑄
鐵錢以一當十

宋之錢法有銅鐵二等而折二折三當五折十則隨時立

制因地定規時西川湖南福建皆用鐵錢與銅錢兼行江南舊用鐵錢十當銅錢一太祖初鑄錢文曰宋通元寶凡諸州輕小惡錢及鐵鑊錢悉禁之

自平廣南朝廷聽權用舊錢勿

過本路之境

其私鑄者皆棄市江南錢不得至江北蜀平聽

仍用鐵錢乾德四年令所在悉用七十七百為貫重四

斤半以上

初輸官錢用八十或八十五為百然諸州私用隨俗至有以四十八為百至是始定開

寶四年詔雅州百丈縣置監冶鑄鐵錢歲鑄九千餘貫

增十壚禁銅錢入兩川

太平興國初復令兼行銅錢一當鐵錢十

九年昇州

言歲鑄三十萬緡命通判杜見素經度采銅時復取唐飛錢故事許民入錢京師于諸州便換其法商人入錢

左藏庫先經三司投牒乃輸于庫

開寶三年置便錢務令商人入錢詣務陳

牒即輦至左藏庫給以券仍勅諸州凡商人贖券至當日給付違者科罰至道末商人入便錢一百七十餘萬貫天禧末增一百一十三萬貫至是乃復增定加饒之數每百緡河東京西加饒三千在京餘路四千

太

宗即位改元太平興國更鑄太平通寶錢二年樊若水言江南舊用鐵錢于民非便宜于昇鄂饒等州產銅之地大鑄銅錢銅錢既不渡江益以新錢則民間錢愈多

鐵錢自當不用悉鎔鑄為農器什物以給江北流民之歸附者除銅錢渡江之禁從之四年聽銅錢入蜀而鐵錢不出境令民輸租及權利鐵錢十納銅錢一時銅錢已竭民甚苦之商賈爭以銅錢入川界與民互市銅錢一得鐵錢十四五年轉運副使張諤言川峽鐵錢十直銅錢一輸租即十取二舊用鐵錢千易銅錢四百自平蜀沈倫等悉取銅錢上供及增鑄鐵錢易民銅錢益買金銀裝發頗失裁制物價滋長鐵錢彌賤請市番人銅

斤鐵錢千可大獲銅鑄錢民租當輸錢者許且輸銀絹
候銅錢多即漸令輸詔令市銅斤給錢五百餘皆從之
然銅卒難得而轉運副使聶詠轉運判官范祥皆言民
樂輸銅錢請歲遍增一分後十歲則全取銅錢詔如所
請祥等以俸所得銅錢市與民厚取其直于是增及三
分民益為苦坐罪者甚衆知益州辛仲甫具言其弊帝
使吳承勲馳傳審度因集諸縣令佐皆言不便尋令川
峽輸租權利勿復徵銅錢詠祥等皆坐罪免西北戎人

多賫貨帛于秦階州易銅錢出塞銷鑄為器詔吏民闌
出銅錢百已上論罪至五貫以上送闕下饒州永平監
用唐開元錢料鑄錢最善轉運使張齊賢即詣闕面陳
八年詔增市鉛錫炭價于是得銅八十一萬斤鉛二十
六萬斤錫十六萬斤歲鑄錢三十萬貫

天聖間歲鑄百餘萬貫慶厯間

至三百萬熙寧六年後歲鑄銅鐵錢六百餘萬貫

時奚嶼請于建州鑄大鐵錢

文曰太平通寶尋罷之雍熙初令江南諸州貯庫雜錢
每貫及四斤半者送闕下不及者銷毀時復禁用惡錢

京城居民蓄銅器者限兩月送官端拱元年詔察民私鑄及銷鎔好錢作薄惡者並棄市輒以新惡錢與蠻人博易者抵罪江北諸州用錢非甚薄惡者新舊大小兼用江南仍用舊大錢淳化間鑄淳化元寶錢自後改元更鑄皆曰元寶又令川峽路改鑄一當十大錢御書錢式諸州舊貯小錢錢悉輦送官從趙安易請也未幾罷仍以銅錢一當鐵錢十四年詔每貫及前詔斤數有官監字號者皆許用不分新舊五年令荆南嶺南民輸稅須大錢

民以小錢二或三易大錢一官屬以俸錢易于民以規
利詔禁之令民輸納但常所通行錢至道二年池州新
置錢監賜名永豐真宗咸平初又申新小錢之禁令官
置場盡市之二年宰臣張齊賢請置監廣鑄命虞部郎

馮亮等按視至建州置豐國監江州置廣寧監

凡鑄錢用銅三

斤十兩鉛一斤八兩錫八兩得錢千重
五斤唯建州增銅五兩減鉛如其數

三年凡鑄一百

二十五萬四年詔犯銅滿五十斤以上取裁餘從第減

舊禁犯銅七斤以上者
處死多蒙減斷因詔

景德中歲鑄一百八十三萬貫

大中祥符間銅坑多不發時鐵錢有三監邛州曰惠民
嘉州曰豐遠興州曰濟衆大錢貫十二斤十兩嘉邛二
州所鑄錢貫二十五斤八兩銅錢一當小鐵錢十兼用
盜多鎔鐵為器每二十五斤鬻之直二千七年從凌策
請詔減景德之制歲鑄總二十一萬貫四方由此錢重
而貨輕時張詠鎮蜀患蜀人鐵錢重不便貿易設質劑
之法一交一緡以三年為一界而換之六十五年為二
十二界謂之交子

交會之法蓋取
于唐之飛錢

富民十六戶主之後

富民資稍衰不能償所負爭訟不息仁宗時轉運使薛田張若谷請置益州交子務以權其出入私造者禁之帝從其議界以百二十五萬六千三百四十緡為額景祐初度支判官許申建議以藥化鐵與銅雜鑄輕重如銅錢法銅三分鐵六分費省而利厚詔命申鑄萬緡工人苦鐵之流澁而多不就逾月纔得萬錢申知言無效乃求為江東轉運使欲行其法于江州朝廷從之詔申即江州鑄百萬緡卒無成功寶元間命錢以皇宋通寶

為文

慶厯以後復
冠以年號

是時軍興陝西移用不足用知商州

皮仲容議采洛南縣江崖山號州青水冶青銅置阜民
朱陽二監以鑄錢既而陝西都轉運使張奎知永興軍
范雍請鑄大銅錢與小錢兼行大錢一當小錢十奎等
又請因晉州積鐵鑄小錢及奎徙河東又鑄大鐵錢以
一當十以助關中軍費未幾三司奏罷河東鑄大錢鐵
錢而陝西復采儀州竹尖嶺黃銅置博濟監鑄大錢因
勅江南鑄大銅錢而江池饒儀號州又鑄小鐵錢悉輦

至關中數州錢雜行大約小銅錢三可鑄當十大銅錢一以致民間盜鑄者衆錢文大亂公私患之于是奎復奏晉澤石三州及威勝軍日鑄小鐵錢獨留用河東河東鐵錢既行盜鑄獲利十六錢輕貨重其患如陝西言者皆以為不便知并州鄭戩請以河東鐵錢二當銅錢一行之一年又以三當一或以五當一罷官鑪日鑄且行舊錢知澤州李昭邁亦言河東民燒石灰家有索冶之具盜鑄者莫可詰而契丹亦鑄鐵錢以易并邊銅錢

朝廷遣魚周詢歐陽修分察兩路錢利害至慶厯末遂命學士張方平宋祁御史中丞楊察與三司雜議時葉清臣復為三司使與方平先上陝西錢議曰關中用大錢本以縣官取利太多致奸人盜鑄其用日輕比年以來皆虛高物估始增直于下終取償于上縣官雖有折當之虛名乃罹虧損之實害救弊不先自損則法未易行請以江南儀商等州大銅錢一當小銅錢三又言姦人所以不鑄小銅錢者以鑄大銅錢得厚利而官不能

必禁若鑄大銅錢無利又將鑄小鐵錢以亂法請以小鐵錢三當銅錢一既而河東小鐵錢如陝西亦以三當一且罷官所置鹽朝廷皆用其言自是奸人稍無利猶未能絕濫錢皇祐中詔商州罷鑄青黃銅錢又令陝西大銅錢大鐵錢皆以一當二盜鑄乃止然令數變兵民耗于用類多咨怨久之始定時興元府西縣增置濟遠監廢尋而韶州天興銅大發歲采二十五萬斤詔即州置永通監饒池江建韶五州鑄錢百四十六萬緡嘉邛興

三州鑄大鐵錢二十七萬緡至和二年韶州岑水場銅
發詔漕司益鑄錢嘉祐四年詔停鑄十年以休民力至
是獨興州鑄錢三萬英宗治平四年置惠州阜民監神
宗熙寧初立偽造交子罪賞如官印文書法二年以河
東運鐵錢勞費乃詔置交子務于潞州尋致鹽礬不售
有害入中糧草遂罷之三年陝西興置鑄錢監市岑水
場銅鉛增鑄百萬緡四年令行交子于陝西而罷永興
軍鹽鈔場陝西轉運副使皮公弼奏自行當二錢銅費

相當盜鑄衰息請以舊銅鉛盡鑄詔聽之自是折二錢
遂行于天下五年交子二十二界將易而後界給用已
多詔更造二十五界百二十五萬以償二十三界之數
交子之有兩界自此始時交子給多而錢不足致價大賤既而竟

無實錢法不可行于是罷陝西交子法六年又詔京西
淮南兩浙江西荆湖各置鑄錢監一又于興國軍睦衡
舒鄂惠州置十監通舊六監為十六監時諸路大率務
于增額惠州永通卓民舊額八十萬至七年增三十萬
及折二凡五十萬衛州黎陽監歲增折二五萬

緡西京阜財監歲增十萬緡興州濟衆監歲增
七萬二千餘緡陝西銅錢監三歲各增五萬緡又于陸

徐梧萬皆置監秦鳳等路即鳳翔府斜谷置監至是法
弊私錢雜用不能禁詔在官惡錢不堪用者別為模以
鑄八年于商號洛南增置三監耀廊又權置二監合通
永興華河中共為監九以給改鑄令候改鑄罷并其工
作歸永興等四監專鑄大錢知太原韓絳請倣陝西令
本重模精以息私鑄之弊元豐元年興州濟衆監增鑄
并舊為七萬二千餘緡二年通遠軍監改鑄銅錢自是

而後西師大舉邊用匱闕同渭秦隴等州監并廢置而
又自弛錢禁民之銷毀與夫關出境外者為多張方平
嘗極諫曰禁銅造幣盜鑄者抵罪至死示不與天下共
其利也故諸監所鑄錢悉入于王府歲出其奇羨給之
三司方流布于天下然自太祖平江南江池饒建置鑪
歲鼓鑄至百萬緡積百年所入宜乎貫朽于中藏充足
于民間矣比年公私上下並苦乏錢百貨不通人情窘
迫謂之錢荒不知歲所鑄錢今將安在夫鑄錢禁銅之

法舊矣令勅具載而自熙寧七年頒行新勅刪去舊條
削除錢禁以此邊關重車而出海舶飽載而回聞沿邊
州軍錢出外界但每貫收稅錢而已錢本中國寶貨今
乃與四海共用又自廢罷銅禁民間銷毀無復可辦銷
鎔十錢得精銅一兩造作器用獲利五倍如此則逐州
置鑪每鑪增數是猶畎澮之益而供尾閭之洩也三年
計諸路鑄錢總二十七監鑄銅鐵錢五百九十四萬九
千二百三十四貫

銅錢十七監鑄五百六萬鐵錢九監
鑄八十八萬九千二百三十四貫鐵

錢惟成都梓州利州夔州四路行使其餘開封府管十三路俱行使銅錢八年復申錢幣關

出之禁

時哲宗已即位

勅罷徐州寶豐鼓鑄及凡增置鑄錢監

罷者十四陝西行鐵錢至陝府以東即銅錢地民以鐵錢換易有輕重不等之患哲宗元祐二年置河中府龍門韓城錢監八年命公私給納貿易並專用鐵錢而官帑銅錢以時計置運致內郡商旅願于陝西內郡入銅錢給據請于別路者聽罷二廣鑄折二錢時鐵錢寢輕以銅錢千易鐵錢二千五百

熙豐間銅鐵錢常並行銅錢十易鐵錢千五百未有

輕重之弊

因定鈎致折二銅錢之法欲復舊止行于本路議者謂關東諸路既已通行奪彼予此理亦非便且陝右所用折二鐵錢止當一小銅錢即折二銅錢盡歸陝西猝難鈎致且與鐵錢一等慮鐵錢轉更加輕乃令折二銅錢寬所行地聽行于陝西及河東晉絳等州餘路則禁仍限二年無更用尋詔更鑄小銅錢紹聖二年施州置廣積監時交子界率增造以給陝西沿邊之用少者數十萬緡多則百萬而成都之用又請印造故每歲無

定數元符二年詔陝西悉禁銅錢在民間者盡送官取
就京西置監徽宗嗣位議者謂鐵錢重滯難以齎遠而
銅錢積貯州縣反無所用乃詔銅鐵錢聽民間通行而
銅錢止用糴買時鐵錢多而銅錢少有請鑄銅錢者

陝西

轉運副使孫傑

有請罷鑄鐵錢者

轉運判官都貺

會蔡京當政令陝西

鑄當十錢及夾錫錢許天啟推行其法當十錢除陝西
四川河東係鐵錢地方不得行使外諸路並行之如有
私鑄即以一文計小錢十定罪夾錫錢以一折銅錢二

既而河東轉運使洪中孚言二敵以中國錢鐵為兵器

請鑄夾錫當三當十錢通行于天下

會蔡京罷相乃止

又令陝

西及江池饒建州以歲所鑄小平錢增料改鑄當五大

銅錢以聖宗通寶為文既而并令舒睦衡鄂錢監用陝

西式鑄折十錢是時諸州所積折二錢甚多法不許轉

運京師發運司請以官帑所有折二錢改鑄折十錢崇

寧三年罷鑄小平錢及折五錢置監于京城復徐州寶

豐衛州黎陽監並改鑄折二錢為折十折二期一歲勿

用大嚴私鑄之令民間所用鑄石器物並官造鬻之又令二廣于產鐵處鑄小鐵錢止行于兩路于潯州置鐵錢監依陝西料鑄當二錢時令京西北路通行交子四年令諸路用錢引惟閩浙湖廣不行罷在京并永興軍交子務又立錢綱驗樣法崇寧監以所鑄當十錢來上緡重銅九斤七兩有奇鉛半之錫居三之一詔頒式于諸路令赤仄及烏背書畫分明時尚書省言東南諸路盜鑄當十錢者多令福建廣南毋行用第鑄以上供及

給他路行使其本路別鑄小平錢又命荆湖南北江南
東西兩浙並以折十錢為折五舊折二錢仍舊乃以江
為界淮南重寶錢亦作當五用五年盜鑄尤甚小平錢
益少命以折五折十為上供小平錢留本路錢監歲課
以八分鑄小平錢二分鑄當十錢又詔福建淮南等處
以折二錢改鑄折十復罷鑄當十二分之令盡鑄小平
錢荆湖江南兩浙淮南重寶錢作當三在京畿及熙河
等處作當五旋復詔當十錢仍舊兩浙作當三江南淮

南荆湖作當五尋詔當十錢止行于京師陝西河東河北俄畿內并用之餘路悉禁期以一季送官償以小錢

私錢亦限一季自致計銅直增二分償以小錢

尋令外路每一

私錢計小平錢三以小錢易于官在京以四小平錢易之

隱匿者論如法又詔鄭州

西京亦聽用折十錢尚書省言錢引本以代鹽鈔而諸路行之不通欲權罷印製在官者如舊法更印改解鹽鈔民間者許貿易漸赴買鈔所如鈔法分數計給從之大觀元年復主用折十錢京畿置錢監專鑄之衡鄂舒

暨廣南皆鑄夾錫錢

時蔡京復相

轉運使宋喬年鑄烏背漉

銅錢進詔以漉銅式頒諸路并頒大觀新修錢法于天

下又置真州鑄錢監以本路不依式錢及當二錢用舊

式改鑄當十錢改四川交子務為錢引務更界年新交

子一當舊者四故更張之以四十三界引準書放數

時用

兵惶靡西寧籍其法以助邊費較

天聖一界逾二十倍而價愈損

二年詔永興軍更置

務納換陝西河東引令江池饒建州錢監自來歲以鑄

當十五分鑄小平錢復申私鑄之法三年申當十錢行

使之令益以京東京西行使而河北並邊州縣鎮砦四
榷場及登萊密州緣海縣鎮等皆禁復以兩浙鑄夾錫
錢擾民詔東南皆罷鑄

時蔡京復罷相

又詔錢引四十一界至

四十二界毋收易四年假四川提舉司封椿錢五十萬
緡為成都務本又詔鼓鑄當十錢多慮法隨以弊其止
鑄舊額小平錢時利州路錢輕貨重提刑司言欲將折
二大鐵錢以一折一雖稍減錢數錢必稍重詔許陝西
鐵錢仍舊入蜀其河北河東京東皆罷鑄夾錫錢產銅

郡縣改鑄小平錢政和元年詔官私當十錢可並作當
三以為定制時御府之用日廣東南錢額不敷宣和以
後尤甚乃令饒贛錢監鑄小平錢尋又令江池饒錢監
盡以小平錢改鑄當二錢以紓用度二年復鑄夾錫錢
如故廣西湖北淮東如之且令諸路以銅錢監復改鑄
夾錫遂以政和錢頒式焉未幾以夾錫錢不以何路所
鑄並許通行陝西用政和通寶舊大鐵錢與夾錫錢雜
慮流轉諸路四年詔無更行用致令諸監改鑄夾錫錢

鄭居中劉正夫為相奏禁淮南諸路夾錫錢并罷各監
各監鑄造止用舊法鼓鑄重和元年權罷京西鑄夾錫
錢繼以關中糴買用復命鼓鑄專給關中行欽宗靖康
元年令川引並如舊即成都府務納換以置務成都便
利歲久至諸州則有料次相雜之弊

欽定續通典卷十一

欽定四庫全書

欽定續通典卷十二

食貨

錢幣中

南宋 遼 金

南宋經兵革之後州縣困敝鼓鑄皆廢高宗建炎元年
工部郎李士觀言江池饒建州四監歲鑄錢百三十三
萬餘緡多未輸者請令發運司委官催督時東南小平
錢甚重張壽言改當十為當三無私鑄之利請行於東

南於是當三大錢始通於淮浙荆湖諸路又鑄建炎通寶錢二年罷益利夔三州鑄三年命江池饒錢監以二萬五千緡為一綱紹興初併廣寧監於虔州併永豐監於饒州歲鑄纔及八萬緡銅鐵鉛錫之入不及於舊而官吏稍廩工作之費仍各如故每鑄錢一千率用本錢二千四百文工部進真篆當二小平銅鐵錢樣詔下鑄錢司時張浚因婺州屯兵請樁辦合用錢而路不通舟錢重難致乃造闕子付婺州召商人入中執闕於樁貨

務請錢願得茶鹽香引者聽於是州縣以關子充糴本
未免抑配而權貨務又止以日輸三分之一償之人皆
嗟怨六年詔置行在交子務造百五十萬緡充糴本是

張澄請依四川法造交子三十萬行於江淮至是遂置務

臣僚言朝廷措置見錢關

子有司寔失本意改為交子官無本錢民何以信於是
罷交子務令權貨務儲見錢印造關子時復斂民間銅
器詔民私鑄銅器者徒二年提點官趙伯瑜以贛饒二
監為得不償費請罷鼓鑄九年詔陝西諸路復行鐵錢

十三年韓球為使復鑄新錢興廢坑冶至於發冢墓壞
廬舍籍治戶姓名以膽水盛時浸銅為歲額無銅可輸
者至鎔錢為銅然所鑄亦纔及十萬緡十五年置利州
紹興鑄錢監鑄錢十萬緡以救錢引二十二年復嘉之
豐遠邛之惠民鑄小平錢二十三年詔利州並鑄折二
錢後又鑄折三錢二十四年罷鑄錢司歸之漕司二十
七年出版漕錢八萬緡為鑄本歲權以十五萬緡為額
復饒贛韶鑄錢監二十八年出御府銅罷千五百事付

泉司大索民間銅器得銅二百餘萬斤寺觀鐘磬鏡鈸
既籍定投稅外不得添鑄二十九年印公據關子付三
路總領所准西湖廣關子各八十萬緡淮東公據四十
萬緡皆自十千至百千凡五等內關子作三年行使公
據二年許銀錢中半入納又令命官之家留見錢二萬
貫民庶半之餘限二年聽轉易越數寄隱許人告以李
植提點鑄錢公事植言歲額內藏庫二十三萬緡右藏
庫七十餘萬緡皆至道以後數也紹興以來歲收銅二

十四萬斤鉛二十萬斤錫五百斤僅可鑄錢一十萬緡
諸道拘到銅器二百萬斤附以鉛錫可鑄六十萬緡然
拘者不可以常唯當據坑冶所產工部權以五十萬緡
為額又明年纔鑄及十萬緡今泉司歲額增至十五萬
緡小平錢一萬八千緡折二錢六萬六千緡歲費鑄本
及起網糜費約二十六萬緡司屬之費又約二萬緡東
南十一路一百一十八州之所供有坑冶課利錢木炭
錢錫本錢約二十一萬緡比歲所收不過十五六萬緡

耳歲額金一百二十八兩銀無額以七分入內庫三分
歸本司銅三十九萬五千八百斤鉛三十七萬七千九
百斤錫一萬九千八百七十五斤鐵二百三十二萬八
千斤比歲所權十無二三每當二錢千重四斤五兩小
平錢千重四斤十三兩視舊制銅少鉛多錢愈鏤薄矣
三十年錢端禮為戶部侍郎被旨造會子端禮委徽州
創樣捺造紙五十萬

續造于成都
又造于臨安

邊幅皆不翦裁初以

分數給朝士俸而於市肆要開處置五場輦見錢收換

每一千別輸錢十以為吏卒用商賈入納外郡綱運悉同見錢無欠數賠償及脚乘之費公私便之三十一年始立會子務分一千二千三千凡三等詔隸都茶場明年定偽造會子法初止行於兩浙後通行於淮浙湖北京西除亭戶鹽本用錢其路不通舟處上供等錢許盡輸會子其沿流州縣許錢會中半民間典賣田宅馬牛舟車等如之全用會子者聽孝宗隆興元年詔鑄當二小平錢又令會子以隆興尚書戶部官印會子之印為

文更造五百及三百二百文會置江州會子務又於大
軍庫儲見錢印造五百并一貫直便會子發赴湖廣襄
郢等處大軍當見錢流轉止行於本路
三年收其印板
自後屢以闕子
鈔引及新會換易至光宗紹熙初詔湖廣會子微行在
立界收換寧宗嘉定中以舊楮二而易其一又令以一
楮半而易其一軍民便之
嘉熙寶祐以後因初行之二年會子印造益多實錢浸

少至於十而損一帝念其弗便出內庫銀二百萬兩售

於市以錢易楮焚棄之僅解一時之急
洪邁密齊隨
筆作三年餉

臣趙沂請添印錢引二百萬
北宋時蜀交出枚兩界每
界一百二十餘萬後三界

通行為三千七百八十餘萬至紹興末積至四千一百四十七萬餘貫時所貯鐵錢僅及七十萬貫以鹽酒等陰為稱提是以餉臣王之望亦謂添印錢引以救目前詔添印三百萬之望止添印一百萬至是大增印乾道初詔兩淮京西悉用鐵錢荆門地接襄峴亦用鐵錢二年詔別印二百三百五百一貫交子三百萬止行使於兩淮其舊會聽對易凡入輸買賣並以交子及錢中半如往來不便以交子會各二十萬付鎮江建康府權貨務使淮人之過江江南人之渡淮者皆得對易循環以用尋以交子不便復詔銅錢并會子依舊過江行用

民間交子許作見錢輸官三年詔造新交子一百三十萬付淮南漕司分給州軍行使不限以年尋以民間會子破損別造五百萬換給又詔損會貫百錢數可驗者並作上供錢入輸巨室以低償收者坐之四年以取到舊會毀抹付會子局重造三年立為一界界以一千萬貫為額隨界造新換舊凡舊會破損貫百字存印文可驗者即與兌換五年令行在權貨務都茶場將請筭茶鹽香礬鈔引權許收換第一界會子

後每界收
換如之

其州縣

諸色綱錢以七分收錢三分收會六年舒蘄黃各置監
鑄折二錢令兩淮通行九年大江之西及湖廣間多毀
錢夾以泥沙重鑄號尾錢詔嚴禁之淳熙二年又併贛
司歸饒州三年詔第三界第四界會子各展限三年令
都茶塲會子庫以第四界續印會子二百萬貯南庫時
戶部歲入一千二百萬其半為會子南庫以金銀換收者四百萬流行於
界外者二百萬耳五年以蜀引增至四千五百餘萬立額不令
再增九年詔廣泉明秀漏泄銅錢坐其守臣船商往來錢寶多泄

因詔十年併舒州宿城監入同安監十二年詔舒蘄鑄錢以淳熙通寶為文十五年四川餉臣言大安軍及嘉川縣產鐵七十餘萬斤乞從鼓鑄光宗紹熙元年詔第七第八界會子各展三年臣僚言會子界以三年為限今展至再則為九年何以示信於是詔造第十界立定年限二年詔川引展界行使三年詔造交子二百萬付淮東造一百萬付淮西每貫准鐵錢七百七十文足以三年為界寧宗慶元元年詔會子界以三千萬為額三年

禁銅罷期兩月鬻於官復神泉監以所括銅罷鑄當三
大錢四年詔兩淮第二界會子限滿明年六月更展一
界嘉泰三年罷舒蘄鼓鑄開禧三年復之時川引兩界
出放凡五千三百餘萬緡通三界出放益多嘉定初川
引每緡止直鐵錢四百以下餉臣陳咸出金銀度牒一
千三百萬收回半界期以歲終不用諸州去總所遠者
千數百里期限已逼受給之際吏復為奸於是商賈不
行民皆嗟怨一引之直僅售百錢制司乃諭人除易一

千三百萬引三界依舊通行又檄總所取金銀就成都
置場收兌民心稍定自後引直鐵錢五百又即利州鑄
當五大錢二年以三界會子數多稱提無策會十一界
除已收換尚存一千三百六十萬餘貫十二界十三界
除燒毀尚存一萬二百餘萬貫詔封樁庫撥金一百五
萬兩度牒七千道官告綾紙乳香湊成三千餘添貼臨
安府官局收易舊會品搭入輸以舊會之二易新會之
一五年江北以銅錢一易鐵錢四詔禁之時銅錢之在

江北者悉以鐵錢易之或以會子一貫易銅錢一貫道乾

以後其銅錢輸送行在易京西銅錢亦如兩淮例九年

四川安撫制置大使司言川引每界舊例三年一易自

開禧軍興以後用度不給展年收兌遂至兩界三界通

使然卒以三年界滿方出令展界以致民聽惶惑今欲

以十年為一界著為定令則民旅不復懷疑從之青田

縣主簿陳耆卿奏言錢猶母也楮猶子也母子所以相

權不可重子而輕母也夫有錢而後有楮益多則其壅

滯益甚甚則稱提之說興焉厥今在朝在野日夜講畫而奉行未嘗有言及錢者楮日多錢日少禁楮之折閱者日嚴而禁錢之漏泄者日寬非果寬也寬於大而獨嚴於小則雖謂之寬可也閹堵之間有腰百金以出者吏卒已目送之積而至於數百則櫛撫之鞭笞之矣高檣巨舳出沒江海有豪家窟穴其中則人不敢仰視間能捐豪末以餌邏卒則如履康莊矣若是者知幾數百耶夫豪家之弊猶可言也富商之弊不可言也豪家泄

之於近而富商泄之於遠泄於近猶在中國也泄於遠則轉及外夷而不可復返矣夫一金之鑄其為費不啻數金一金之博易其為利亦不啻數金朝廷常以數金之費而為富商謀數金之利錢既日耗則其命遂歸於楮其弊遂積於楮而上下之間遂一切併力於楮不知楮之所以難行者不獨以楮之多而亦正以錢之少也存者既少藏者愈牢故雖以重法欲散出之彼將曰吾之錢吾所自有吾所藏也被以中國之所有而散之外

夷上不之禁而何以咎我是故家可室身可辱而心不
可服盍亦反其本乎故臣以為今日之務不專在於稱
提楮弊又在於稱提銅錢也蓋今銅錢之法大率犯者
罰輕而捕者賞輕犯者罰輕則人易為奸捕者賞輕則
吏不盡力臣愚欲望聖慈申飭攸司嚴漏泄之憲優掩
獲之典其捕至若干者特與附類獲盜改秩以風厲之
庶幾各務罄竭以從上之令誠使錢不甚荒則楮不偏
勝此稱提本務也江西提舉袁燮疏曰我孝宗皇帝頒

楮幣於天下常通而不壅常重而不輕無他道焉有以收之而已自開禧用兵造幣甚廣知散而不知收故其價甚賤今日更定其法固將流通而不窮其可不法孝宗所以收之者乎蓋楮之為物也多則賤少則貴收之則少矣賤則壅貴則通收之則通矣雖然朝廷收之可也州郡若何收之曰是在長吏而已長吏而賢何事不集今公清者少貪濁者衆肆為姦賊無所忌憚尚何望其財用之積而楮幣之收乎我朝家法最為忠厚而獨

於賊吏之罰甚峻深知其蠹不得不然當今之務謂宜
痛懲貪濁崇獎公清蓋公清之士必能正身律下而黠
吏莫措其奸必能愛惜財物而冗費無所不節必能選
擇官僚講理財之策必能寬裕民力養豐財之源薄關
市之征則商旅四集謹鈺銷之防則銅錢不耗嚴交易
稅契之法則泉貨頓增守錢會相半之制則藏鏹可出
財既裕矣視時楮價其賤耶亟從而收之何憂其不貴
至日月浸久價將復賤則又收之非常收也賤而後收

也此孝宗之規模也今為郡守者或拘民間米鹽並從
官賣或科有餘之家強以買會或令民間輸納非買楮
於官者不與收接甚者課吏收歛聽其自賣而輸緡錢
於官朝夕紛紛與民爭利甚非治民之事也惟聖主速
救之又上便民疏曰臣聞楮幣之用至今而窮立法而
稱提之所以濟其窮也然今日之所謂稱提者果能有
濟乎始以法令從事兌不以省陌者必罰無赦未幾從
民之便又未幾而有三分七分之說展轉屢變而卒歸

於銅錢楮幣之相半是復其舊也是猶未始稱提也經
久可行之策顧不在茲乎今議者急於豐財欲用鐵錢
與銅錢並行當不足之時倏焉有餘寧不可喜而其實
有不然者往時楮幣多故銅錢少而又並以鐵錢不愈
少乎往時楮幣多故物價貴今又並以鐵錢不愈貴乎
銅鐵之價固不相若鑄以為錢孰貴孰賤兼用之於市
而實得銅錢之直得無徒費鐵錢乎兩淮虛耗甚矣運
鐵錢於江南貿易而歸固將裕之也然江南之楮幣易

淮甸之鐵錢厥價三倍奸巧之民爭先取之此盈而彼
虛矣鐵錢日以朘削銅錢禁不得往淮人將安所用哉
名曰裕之其實感之臣不知其可也且夫鐵錢之易就
非若銅錢之難成盜錢如雲而起楮之輕也滋甚譬之
人方病寒又以涼劑投之祇益其病而已內不足以權
楮外不足以裕淮將何便於此哉且今日楮幣之輕得
非以銅錢之寡歟海舶之洩未始無法也而檢空之委
得於情懇納其私賄縱其私裁則連櫓而去奸民相結

貯錢小舟潛往海洋納諸巨舶捆載而歸此錢之所由
少也獨不可申嚴其禁乎銷錢為器未始無法而獲利
十倍人競趨之所在公行若當然者句容天台四明池
陽臨川之所鑄者以精巧名人皆貴之此錢之所以銷
也獨不可痛懲其奸乎鼓鑄之司令至嚴也每歲增之
何可勝用自黠吏既漁其利而場戶復濟其奸憚取銅
之難銷錢以輸之幸其精煉無復致詰錢安得而不耗
獨不可堅明其約束乎邦有常典講若畫一人不畏法

以法繩之誰敢不服若夫守法之地人皆觀瞻而先自
廢法罪莫大焉銅楮相半之制其未舊矣乃創為新例
輸楮於官者必令貼納是利其贏也是弛相半之法而
置錢於無用之地也奸民乘之逞其私欲毀之匿之者
不勝其衆是孰為之倡哉臣竊觀當今州郡大抵兼行
楮幣所在填委而錢常不足間有純用銅錢不雜他幣
者而錢每有餘以是知楮惟能害銅非能濟銅之所不
及也加之貼納豈貸泉之利也哉朝廷深懲往事革三

分七分之弊而復二者均平之法此乾道淳熙之美意也人情翕然僉曰至當守法之使昭晰如此夫法有常守則觀聽不惑而民有定志法不一定則前後相戾而人無信心守銅楮相半之法悠久不變而異時謀利撓法之蠹蕩滌無餘尚何憂銅錢之寡而楮幣之輕乎此當今之急務也唯明主留意焉理宗寶慶元年新錢以大宋元寶為文紹定五年兩界會子已及三億二千九百餘萬端平元年復申嚴銅錢入海之禁二年臣僚請

以兩界舊會付封樁庫收貯以備緩急從之嘉熙元年
詔新錢當二并小平錢並以嘉熙通寶為文當三錢以
嘉熙重寶為文淳祐二年宗正丞韓祥奏壞楮弊者只
緣變更救楮弊者無如收減自去年至今楮價粗定不
至折閱者不變更之力也今已罷諸造楮局及諸州科
買楮皮更多方收減則楮價有可增之理帝善之三年
臣僚言今官印之數雖損而偽造之券愈增且以十五
十六界會子言之其所入之數宜減於所出之數今收

換之際元額既溢舉者未已若非偽造其何能致多如
是大抵前之二界盡用川紙物料既精工製不苟民欲
為偽尚或難之迨十七界之更印以雜用川杜之紙至
十八界則全用杜紙矣紙既可以自造價且五倍於前
故昔之為偽者難今之為偽者易人心循利甚於畏法
況利可立致而刑未即加者乎臣愚以為抄撩之際增
添紙料寬假工程務極精緻使人不能為偽者上也禁
捕之法厚為之勸厲為之防使人不敢為偽者次也四

年復申嚴銅錢漏泄之禁七年以十八界十七界會子
更不立限永遠行使八年監察御史陳求魯言議者謂
楮便於運轉故錢廢於蟄藏自稱提之屢更園法為無
用急於扶楮者至嗾盜賊以窺人之閭奧峻刑法以發
人之窖藏然不思患在於錢之荒而不在於錢之積夫
錢貴則物宜賤今物與錢俱重此一世之所共憂也蕃
舶巨艘若山嶽乘風駕浪深入遐貳販於中國者皆浮
靡無用之異物而泄於外地者乃國家富貴之操柄所

得幾何所失者不可勝計矣京城之銷金衢信之鑰器
醴泉之樂具皆出於錢臨川隆興桂林之銅工尤多於
諸郡姑以長沙一郡言之烏山銅爐之所六十有四麻
潭鷺羊山銅戶數百餘家錢之不壞於器物者無幾今
京邑鑰銅器用之類鬻賣公行於都市畿甸之近一繩
以法由內及外觀聽聿新則鉅銷之奸知畏矣香藥象
犀之類異物之珍奇可悅者本無適用之實服御之間
昭示儉德自上化下風俗丕變則漏泄之弊少息矣此

端本澄源之道也詔從之十年以會價低復申嚴下海
之禁十一年以會價增減課其官吏十二年申嚴鈺銷
之禁及偽造漏泄之法寶祐元年詔新錢以皇宗元寶
為文時賈似道當國請稱提楮幣改造金銀見錢關子
以一準十關子之制上一黑印如西字中三紅印相連如目字兩傍各一小長黑印宛然一賈字
銀關既行物價頓踴矣四年臺臣奏川引銀會之弊皆
因自印自用有出無收當拘印造之權歸之朝廷倣十
八界會子造四川會子視淳祐之令作七百七十陌於

四川州縣公私行使兩料川引並毀見在銀會姑存舊引既清新會有限則楮價不損物價自平公私俱便矣從之景定四年以收買逾限之田復增印會子一十五萬貫度宗咸淳元年復申嚴鈺銷漏禁四年以近頒見錢關子貫作七百七十文足十八界每道作二百五十文足三道準關子一貫同見錢轉使公私擅減者官以賊論吏則配籍五年復申嚴關子減落之禁復以會板發下成都運司掌之七年以行在紙局所造關子紙

不精命四川制使抄造輸送每歲以二千萬作四川綱引

遼太祖以土產多銅廣造錢幣遂致富強以開帝業太宗置五冶太師以總四方錢鐵石散塘又獻沿邊所積錢以備軍實景宗乾亨中以舊錢不足於用始鑄乾亨新錢錢用流布聖宗統和十四年鑿大安山取劉守光所藏錢散諸五計司又出內藏錢賜南京諸軍司太平中鑄太平錢新舊互用興宗重熙二十二年長春州

置錢帛司道宗清寧二年詔行東京所鑄錢九年令諸路不得貨銅鐵以防私鑄又定銅鐵入回鶻法禁益嚴矣大康九年禁外官部內貸錢取息十年禁毀銅錢為器大安四年禁錢出境是時錢有四等曰咸雍大康大安壽隆皆以改元易名肉好銖數不可考後經費浩繁鼓鑄仍舊國用不給至天祚之世更鑄乾統天慶天祚帝年號二等新錢而上下窮困府庫無餘積矣

金初用遼宗舊錢太宗天會末亦用齊劉豫國號阜昌元寶

阜昌重寶錢海陵貞元二年置印造鈔引庫及交鈔庫

用宋張詠交子法製鈔

一貫二貫三貫五貫十貫為大鈔一百二百三百五百七百為

小鈔以七年為限與錢並行尋罷七年之限令民得常用

歲久字文磨滅許於所在官庫納舊換新每貫取工墨

錢十五文正隆二年始議鼓鑄又禁銅越境外懸罪賞

格括民間銅鑰器三年中都置監二

東曰寶源西曰寶豐

宗兆置

監一

曰利

鑄錢文曰正隆通寶輕重如宗小平錢而肉

好字文峻整過之與舊錢通用世宗大定元年命陝西

參用舊鐵錢四年以鐵錢不行詔罷之八年禁銷錢鑄
鏡者十年以官錢多積恐民間不得流通令諸處貿易
金銀絲帛以圖流轉時吏多抑配反害百姓帝切責之
十一年禁私鑄銅舊有銅器悉送官給其直之半惟神
佛像鐘磬魚袋之屬則存之十二年以銅少遣使諸路
規措銅貨能指坑冶得實者賞十三年命非屯兵之州
府以錢市易金帛運致京師使錢幣流通以濟民用十
六年遣使分路訪察銅鑛苗脉十八年代州立監

二十
年命

名卓鑄錢命工部郎中張大節吏部員外郎麻珪監保

德軍鑄錢監

初命李天吉知軍事高季孫往監之而所鑄班駁黑流不可用詔削天吉季孫官兩

階仍扶季孫八十

其錢文曰大定通寶字文肉好二十年詔與

舊錢並用初新錢之未行也以宋大觀錢當五用之又

令官民用錢皆以八十為陌

從幹魯補請也時獨民間以八十為陌為短錢官司

用足陌為長錢至是遂定為制

二十三年令交鈔易新不拘貫例每張

取工墨錢八文二十六年命諸路官錢非屯兵處可盡

運至京師從丞相克寧請止運其半二十七年曲陽縣

鑄錢別為一監

名利通

二十九年以代州曲陽二監歲鑄

錢十四萬餘貫而歲所費至八十餘萬遂罷之

時章宗已即位

章宗明昌二年防銷錢鑄鏡減賣鏡價

大定間定制民間以銅鏡申賣

入官每斤三百一十四文

三年勅民間流轉交鈔當限其數毋令多

於見錢四年令籍錢貯於庫以備緩急時陝西交鈔多

於見錢民艱流轉令本路榷稅及諸名色錢折交鈔五

年令官民之家以品從物力限見錢多不過三萬貫明

安穆昆以牛具為差不得過萬貫凡有餘今易諸物收

貯之承安二年交鈔工墨錢令收十二文以鈔買鹽引
每貫權作一貫一百文時交鈔所出數多民間成貫例
艱於流轉詔西北二京遼東路從宜給小鈔且許於官
庫換錢與他路通行又鑄銀名承安寶貨

一兩至十兩分
五等每兩折錢

二貫公私同見錢用仍定銷鑄及接受稽留罪賞格

舊例
銀每兩

鈔五十兩其直百貫民
有截鑿者價亦隨低昂

凡官兵俸及邊戍軍須皆以銀

鈔相兼行使三年令以錢與外方人使及與交易者徒
五年三斤以上死驅儉同罪捕告人官先代給賞五百

貫其接引館伴等以次坐罪仍令均償時交鈔稍滯命
西京北京臨潢遼東等路一貫以上俱用銀鈔寶貨一
貫以下聽民便復以一貫以下交鈔許易錢用之時官
民多不遵限錢法遂復減元限之數更定官民存留錢
法三分為率親王公主品官許留一分餘皆半之其贏
餘之數期五十日內盡易諸物違者以違制論以錢償
告者又於兩行部各置回易務以綿絹物服易銀鈔亦
許本務納鹽鈔赴權場出鹽引納鈔於山東河北河東

等路從便易錢各降補官及德號空勅三百度牒一千
從兩行部指定處限四月進納補換又置四庫更造一
百例小鈔以代鈔本並許官庫易錢一貫二貫例並支
小鈔三貫例則支銀一兩小鈔一貫若五貫十貫例則
四分支小鈔六分支銀欲得實貨者聽有限滯及輒減
價者罪之四年以銀鈔阻滯令院務諸科名錢除京師
河南陝西銀鈔從便餘路並許收銀鈔各半仍於鈔四
分之一許納其本路隨路所收交鈔除本路者不復支

發餘通行者並循環用之權貨所鬻鹽引收納寶貨與鈔相半銀每兩止折鈔兩貫許人依舊詣庫納鈔隨路漕河所收除額外羨餘者亦如之所支官錢亦以銀鈔相兼銀已零截者令交鈔庫不復支若寶貨數少可復增鑄銀鈔既通則物價自平雖有禁法亦安所施因除阻滯銀鈔罪制又命在部官錢權貨務鹽引並聽收寶貨附近監司貼錢數亦許帶納民間寶貨有所歸自然通行不至銷毀時復令不須印造小鈔俟其換錢既盡

可罷四庫但以大鈔驗錢數支易見錢時私鑄永安寶
貨者多雜以銅錫寢不能行京師閉肆五年罷永安寶
貨泰和元年通州刺史盧構言銀出多入少市價不平
若令諸稅以錢銀鈔三分均納庶革其弊下省議宰臣
謂軍興用交鈔以出多遂滯如欲均納必至偏勝至欲
銀價之平宜令諸名各鋪馬軍須等錢許納銀半無者
聽便二年令諸稅各帶納三合同交鈔一分先是嘗行之後止行
於民間而官不收民雖止係本路者亦許不限路分通納
欽朝廷慮其病民

戶部見徵累年鋪馬錢亦聽收其半尋廢不用至是國
虛民貧其弊彌甚四年罷限錢法五年欲增鑄錢命百
官議足銅之術中丞孟鑄謂銷錢作銅及盜用出境者
不止宜罪其官及隣太府監梁瑄等言鑄錢甚費率費
十錢得一錢識者謂費雖多猶增一錢也乞採銅拘工
以鑄宰臣謂鼓鑄未可速行其銅冶聽民煎煉官為買
之凡寺觀不及十人不許畜法器民間鑄銅器期以兩
月送官給價匿者以私法坐限外人告者以知而不糾

坐其官寺觀許童行告者賞又定使易錢法聽人輸納
於京師而於山東河北大名河東等路依數支取後鑄
大錢一直十篆文曰泰和重寶與鈔參行時又令交鈔
工墨錢貫止收六文六年陝西交鈔不行以見錢十萬
貫為鈔本與鈔相易復以小鈔十萬貫相參用之時復
許諸路各行小鈔於各路府州官庫易錢又令戶部印
小鈔五等附各路同見錢用七年勅在官毋得支出大
鈔在民者令赴庫易小鈔及見錢院務商稅及諸名錢

三分須納大鈔一分惟遼東從便時貨幣屢更民多嗟
怨戶部尚書高汝礪等議立鈔法條約凡民間交易典
質一貫以上並用交鈔須立契者三分之一用諸物六
盤山西遼河東以五分之一用鈔東鄙屯田戶以六分
之一用鈔不須立契者惟遼東錢鈔從便工墨錢每張
止收二錢商旅賈見錢不得過十貫所司籍辦鈔人以
防偽冒品官及民家存留見錢比舊減其數若舊有錢
多者許送官易鈔十貫以上不得出京民間有宗會子

亦令同見錢用十貫以上不許特行權鹽許用銀絹餘
市易及俸並用交鈔其奇數以小鈔足之銀絹不足應
支亦給鈔隨處州府各有辦鈔庫去都遠之地設置合
同換錢客旅經之皆可相易納昏鈔者受而不支積半
歲赴都易新鈔又令州縣委官於市肆要處置庫交換
以出首之鈔為鈔本易錢者人不得過二貫帝從之勅
捕獲偽造交鈔者皆以交鈔為賞尋復議更鈔法帝從
高汝礪言命在官大鈔更不許出聽民以五貫十貫例

者赴庫易小鈔欲得錢者五貫內與一緡十貫內與兩
緡惟遼東從便河南陝西山東及他行鈔諸路院務諸
稅及諸科名錢並以三分為率一分納十貫例二分五
貫例餘並收見錢八年京師鈔滯收毀大鈔行小鈔時
孫鐸言院務稅諸名錢可盡收鈔秋夏稅納本色外亦
令收鈔不拘貫例農民知漸重鈔可以流通并請罷諸
州縣鈔局以免市肆押配買鈔令赴省庫易小鈔各限
路分亦甚未便可令通行帝命亟行之又令官兵俸以


十分為率軍兵給錢三分官員承應人給二分多不過
十貫餘皆給鈔民間舊鈔故暗者許所在庫易新若舊
限已滿當更展五十日許令變易鈔引諸物宣宗貞祐
二年乃更作二十貫至百貫例交鈔又造二百貫至千
貫例者時交鈔有出無入輕而不行鈔每貫僅直一錢
三年河東宣撫使喬鼎請權禁見錢令計司以軍須為
名量民力徵歛則泉貨通而物價平矣自是泉貨不用
富家皆至窘敗時謂之生化商人往往舟運貿易於江

淮錢多入於宋矣又詔改交鈔名為貞祐寶券時京師穀價翔踊帝令尚書省集議開封府議謂寶券初行民甚重之但以河北陝西諸路所支既多人遂輕之商賈爭收入京以市金銀銀價昂穀亦隨之若令寶券路各殊制則不可復入河南則河南金銀賤而穀自輕帝從其議而河北寶券遂不復行於河南由是愈滯詔集百官議從陝西行省令史惠吉言更造券以貞祐通寶為名惠吉言自百至三千等之為十聽各路轉運司印造仍不得過五千貫與舊券參用興定元年

始詔行之凡一貫當貞祐寶券千貫重偽造阻格罪及捕獲之賞時製鈔紙用桑皮故紙皆取於民至是鈔法屢更得紙甚艱令計價但徵寶券通寶名曰桑皮故紙錢五年宰臣奏向者寶券既弊乃造貞祐通寶以救之迄今五年其弊又復如寶券之末初通寶四貫為銀一兩今八百餘貫矣宜復更造興定寶泉子母相權與通寶兼行每貫當通寶四百貫以二貫為銀一兩隨處置庫許人以通寶易之縣官能使民流通者進官一階陞職

一等其或姑息以致壅滯則亦追降的決為差州府官以所屬司縣定罪賞命監察御史及諸路行部官察之定撓法失糾舉法失舉則御史降決行部官降罰集眾妄議難行者徒二年告捕者賞錢三百貫元光元年始詔行之二年更造每貫當通寶五十又以綾印製元光珍貨同銀鈔及餘鈔行之三年寶泉幾於不用乃定法銀一兩不得過寶泉三百貫凡物可直銀三兩以下者不許用銀以上者三分為率一分用銀二分用寶泉及

珍貨重寶京師及州郡置平準務以寶銀相易哀宗正大間民間但以銀市易天興二年印天興寶會於蔡州自一錢至四錢四等同見銀流轉



欽定續通典卷十二

欽定四庫全書

吏部

欽定續通典卷十三
四

詳校官監察御史_臣曹錫寶

洗馬臣王坦修覆勘

校對官檢討_臣徐準

謄錄監生_臣馮學源

欽定四庫全書

欽定續通典卷十三

食貨

錢幣下

元明

元初倣唐宋金之法有行用鈔其制無文籍可考太宗時有干元者奏行交鈔耶律楚材曰金章宗時初行交鈔與錢通行有司以出鈔為利收鈔為諱謂之老鈔至以萬貫惟易一餅民力困竭國用匱乏當為鑒戒今印

造交鈔宜不過萬錠從之憲宗時立交鈔提舉司印鈔以佐國用世祖中統元年造交鈔以絲為本每銀五十兩易絲鈔一千兩諸物之直並從絲例又造中統元寶鈔其文以十計者四曰一十文二十文三十文五十文以百計者三曰一百文二百文五百文以貫計者二曰一貫文二貫文每一貫同交鈔一兩兩貫同白銀一兩又以文綾織為中統銀貨其等有五曰一兩二兩三兩五兩十兩每一兩同白銀一兩而銀貨蓋未及行云是

時新鈔行銀鈔不用真定以太后命用銀鈔交通燕趙
以及唐鄧之間數計八千餘中統新鈔將行銀鈔之價
頓虧公私囂然不知措手宣撫司劉肅言救之之法有
三舊鈔不行下損民財上廢天子仁孝之名依舊行用
一也新舊兼用二也必欲令行新鈔直須如數收換庶
幾小民不致虛損三也省議嘉之從其第三策遂降鈔五
十萬貫三年勅私市金銀應支錢物止以鈔為准四年
詔立燕京平準庫均平物價通利鈔法五年給平準庫

鈔一萬二千錠以為鈔本至元三年以楊湜為諸路交鈔都提舉上鈔法便宜事謂平準行用庫白金出入有偷盜之弊請以五十兩鑄為錠文以元寶用之便時有賈胡恃制國用使阿合馬欲貿交鈔本私平準之利以增歲課為辭帝以問馬亨亨對曰交鈔可以權萬貨者法使然也法者主上之柄今使一賈擅之將何以令天下事遂寢十二年議以中統鈔易宋交會禁私造銅器又添造釐鈔其例有三曰二文三文五文初鈔印用木

為板十三年鑄銅易之是年平宋回至揚州丞相巴延

令搜檢將士行李所得撒花銀子銷鑄作錠每重五十

兩銀錠上字號揚州元寶後朝廷亦自鑄

十四年鑄重四十九兩十

五年鑄重四十八兩

又置宣慰司於濟寧路掌印造交鈔供給江

南軍儲置行戶部於大名府掌印造交鈔通江南貿易

雲南行省言雲南貿易與中州不同鈔法實所未諳莫

若以交會貳子公私通行庶為民便從之十四年禁江

南行用銅錢罷濟寧大名印鈔局十五年以釐鈔不便

於民復命罷印十七年江淮等處頒行鈔法廢宋銅錢并括江淮銅及銅錢銅器中書省臣議流通錢法凡賞宜多給幣帛課程宜多收鈔制曰可二十一年勅中書省整治鈔法定金銀價及私自回易官吏奉行不虔者罪之二十二年右丞盧世榮整治鈔法言天下歲課鈔九十三萬二千六百錠之外臣更經畫不取於民裁抑權勢所侵可增三百萬錠初未行下而中外已非議臣請與臺院面議上前行之帝以為不必如此卿但言之

世榮奏古有權酤之法今宜立四品提舉司以領天下之課歲可得鈔千四百四十錠自王文統誅後鈔法虛弊為今之計莫若依漢唐故事括銅鑄至元錢及製綾券與鈔參行因以所織銀券上之上曰便益之事當速行之又增壞鈔倒換工墨費每貫二分為三分

至元二年例用

三十文三年減為二十文至是復增大德二年定每鈔為二十五樣

二十三年中書傳旨

議更鈔用錢同知江西宣慰司事劉宣獻議曰原交鈔所起漢唐以來皆未嘗有宋紹興初軍餉不繼造此以

誘商旅為沿邊糴買之計比銅錢易於擎齎民甚便之稍有滯礙即用見錢尚存古人子母相權之意日增月益其法侵弊欲求目前速效未見良策新鈔必欲創造權用舊鈔只是改換名目無金銀作本稱提軍國支用不復抑損三數年後亦如元寶矣宋金之弊足為殷鑒鑄造銅錢又當詳究秦漢隋唐宋利病著在史冊不待縷陳國朝廢錢已久一旦用之功費不貲非為遠計大抵利民權物其要自不要用始若欲濟邱壑之用非惟

鑄造不數抑亦不久自弊矣二十四年以征遼東所得銀鑄遼陽元寶是年以元寶交鈔行之既久物重鈔輕遂改造至元寶鈔自二貫至五文凡十有一等與中統鈔通行每一貫文當中統鈔五貫文依中統之初隨路設立官庫貿易金銀平準鈔法每花銀一兩入庫其價至元鈔二貫出庫二貫五分赤金一兩入庫二十貫出庫二十貫五百文偽造鈔者論如例告者賞鈔五錠仍以犯人家產給之

時衆欲計至元鈔二百貫贖滿者死趙孟頫曰始造中統時以銀為本虛

實相權令二十餘年間輕重相去至數十倍故中統為至元又二十年後至元鈔必復如中統矣若計鈔抵法疑於太重或詰之曰今朝廷用鈔故犯法者以鈔計賊汝以為非欲阻格至元鈔耶孟頫曰頫奉詔與議不敢不言今中統鈔虛故改至元鈔謂至元鈔終無虛時寧有是理二十五年桑哥言中統

鈔行垂三十年省官皆不知其數今已更用至元鈔宜差官分道置局鉤考中統鈔本詔燬中統鈔板二十六
年桑哥又言初改至元鈔欲盡收中統鈔故令天下鹽課以中統至元鈔相半輸官今中統鈔尚未可急斂宜令稅賦並輸至元鈔商販有中統鈔料聽易至元鈔以

行然後中統鈔可盡從之

至元間許楫為徽州路總管時新舊楮幣並行以新易銀

或患數影楫極言部內民貧不堪

成宗大德九年以鈔

宰臣嘉其誠懇視他郡銀減十八萬錠給雲南行省命與貳參用其貳非出本土者同偽

鈔論

按雲南貳以一為莊四莊為錢四錢為苗四苗為索

十一年庫爾巴雅爾請

更用銀鈔銅錢中書集議以為不便而止武宗至大二

年樂實言鈔法大壞請更之圖新鈔式以進塔思不花

言此大事請與老臣更議不從乃更造銀鈔頒行之詔

曰昔世祖始造中統交鈔以便民用歲久法隳更造至

元寶鈔今二十三年物重鈔輕不能無弊乃循舊典造至大銀鈔自二兩至二釐定為一十三等每一兩准至元鈔五貫白銀一兩赤金一錢隨路立平準行用庫買賣金銀倒換紙鈔或民間絲綿布帛赴庫回易依估給價設常平倉豐年收糴遇歉減價出糴以遏沸躑金銀私相買賣及海舶興販金銀銅錢絲綿布帛下海者並禁之中統鈔到日百日盡數赴庫倒換茶鹽酒醋商稅諸色課程至大銀鈔與至元鈔一體收受如收至大銀

鈔以一當五三年尚書省言以銀鈔為母至元鈔為子
宜與銅錢通行大都立資國院山東河東遼陽江淮湖
廣四川立泉貨監六產銅之地設提舉司十九鑄錢曰
至大通寶每一文準至大銀鈔一釐又鑄大元通寶每
一文準至大通寶錢十文歷代銅錢悉依古例與至大
通用其當五當三折二並以舊數用之尋以銀鈔與銅
錢兼行品目煩碎恐民未悟或有相妨令省臣議之尚
書省言昔至元鈔初行即以中統鈔本供億及毀其板

今既行至大銀鈔乞以至元鈔輸萬億庫銷毀其板止

以至大鈔與銅錢相權通行為便從之四年

時仁宗已即位罷

至大錢鈔詔曰我世祖皇帝參酌古今立中統至元鈔

法天下流行公私蒙利五十年於茲矣比者尚書省不

究利病率意變更既創至大銀鈔又鑄大元至大銅錢

鈔以倍數太多輕重失宜錢以鼓鑄弗給新舊資用曾

未再期其弊滋甚爰咨廷議允協輿言皆願變通以復

舊制其罷資國院及各處泉貨監提舉司買賣銅器聽

民自便應尚書省已發各處鈔本及至大銅錢截日封

貯民間行使者赴行用庫倒換

仁宗時復下詔鼓鑄尋罷後遂專用至元中統

鈔

文宗天歷元年監察御史言戶部鈔法歲會其數易

故以新期於流通不出其數邇者倒刺河以上都經費

不足命有司刻板印鈔二事既定宜急收毀從之二年

更鑄鈔法仍毀其刻者順帝至正十年丞相脫脫欲更

鈔法乃集省臺兩院共議之先是左司郎中武祺以鈔

法不行請如舊凡合支名目於總庫轉支從之至是與

吏部尚書僕哲篤請以鈔一貫文省權銅錢一千文鈔為母而錢為子國子祭酒呂思誠言中統至元自有母子豈有以故紙為母而立銅為子者乎又錢鈔用法以虛換實也今歷年錢與至正錢中統至元鈔交鈔分為五項慮下民藏其實而棄其虛恐不為國家利且至元偽鈔人猶識之交鈔人未之識偽將滋多若錢鈔兼行輕重不論何者為母何者為子脫不從遂定更鈔之議以中統交鈔一貫文省權銅錢一千文準至元鈔二

貫仍鑄至元通寶鈔與歷代銅錢並用以實鈔法至元鈔通行如故令民間通用行之未久物價騰踴至逾十倍十六年禁銷毀販賣銅錢十七年京師立便民六庫倒易昏鈔十八年以陝西軍旅事劇供費艱難遂分戶部寶鈔等官就陝西置局印造寶鈔

明太祖初置寶源局於應天鑄大中通寶錢與歷代錢兼行以四百文為一貫及平陳友諒命江西行省置貨泉局頒大中通寶錢大小五等錢式即位頒洪武通寶

錢其制凡五等曰當十當五當三當二當一當十錢重一兩餘遞降至重一錢止各行省皆設寶泉局與寶源局並鑄而嚴私鑄之禁洪武四年改鑄大中洪武通寶大錢為小錢

初寶源局錢鑄京字於背後多不鑄民間無京字者不行故改鑄小錢以便之

尋

令私鑄錢作廢銅送官償以錢七年帝以有司責民出銅民毀器皿輸官頗以為苦而商賈沿元之舊習用鈔多不任用錢乃設寶鈔提舉司八年令造大明寶鈔令民間通行以桑穰為料

其制方高一尺廣六寸質青色外為橫文花欄橫題其額曰大

明通行寶鈔其內上兩旁復為篆文八字曰大明寶鈔天下通行中國錢貫十串為一貫其下云中書省奏準印造大明寶鈔與銅錢通行使用偽造者斬告捕者賞銀二十五兩仍給犯人財產若五百文則盡錢文為五串餘如其制其等凡六曰一貫曰五百文四百文三百而遞減之

文二百文一百文每鈔一貫準錢千文銀一兩四貫準黃金一兩禁民間不得以金銀貨物交易違者罪之以金銀易鈔者聽遂罷寶源寶泉局十年復設寶泉局鑄小錢與鈔兼行百文以下止用錢商稅兼收錢鈔錢三鈔七十三年令所在置行用庫許軍民商賈以昏鈔納

庫易新鈔量收工墨直十五年置戶部寶鈔廣源庫廣惠庫入則廣源掌之出則廣惠掌之二十二年詔更定錢式生銅一斤鑄小錢百六十折二錢半之當三至當十準是為差更造小鈔自十文至五十文二十四年諭權稅官吏凡鈔有字貫可辨者不問爛損即收受解京抑勒與偽充者罪之二十五年設寶鈔行用庫於東市凡三庫各給鈔三萬錠為鈔本倒收舊鈔送內府令大明寶鈔與歷代錢兼行鈔一貫準錢千文提舉司於三

月內印造十月內止所造鈔送內府充賞賚二十六年
罷行用庫又罷寶泉局時兩浙江西閩廣民重錢輕鈔
有以錢六十文折鈔一貫者由是物價翔貴而錢法益
壞不行二十七年令軍民商賈所有銅錢有司收歸官
依數換鈔不許行使三十年乃更申交易用金銀之禁
成祖初犯者以姦惡論二年詔犯者免死惟置造首飾器皿不
在禁例戶部尚書夏原吉請更鈔板篆文為永樂帝命
仍其舊永樂二年都御史陳瑛言比歲鈔法不通皆緣

朝廷出鈔太多收斂無法以致物重鈔輕莫若暫行戶口食鹽法天下人民不下千萬戶官軍不下二百萬家誠令計口納鈔食鹽可收五千餘萬錠帝令戶部會羣臣議大口月食鹽一斤納鈔一貫小口半之從其議設北京寶鈔提舉司稅糧課程贓罰俱折收鈔其直視洪武初減十之九後又令鹽官納舊鈔支鹽發南京抽分場積薪龍江提舉司竹木鬻之軍民收其鈔應天歲辦蘆柴徵鈔十之八九年令差官於浙江江西廣東福建

四布政司鑄永樂通寶錢仁宗洪熙元年以鈔不行詢
夏原吉原吉言鈔多則輕少則重民間鈔不行緣散多
歛少宜為法歛之請肆市門攤諸稅度量輕重加其課
程鈔入官官取昏軟者悉燬之自今官鈔宜少出民間
得鈔難則自然重矣乃下令曰所增門攤課程鈔法通
即復舊金銀布帛交易者亦暫禁止

是時民
辛輕鈔

宣宗宣德

初米一石用鈔五十貫乃弛布帛米麥交易之禁凡以
金銀交易及匿貨增直者罰鈔府縣衛所倉糧積至十

五年以上者鹽糧悉收鈔秋糧亦折鈔三分門攤課鈔
增五倍塌房店舍月納鈔五百貫果園贏車並令納鈔
俟鈔法通止又禁交易用銀一錢者罰鈔千貫賊吏受
銀一兩者追鈔萬貫更追免罪鈔如之九年令南京工
部并浙江等布政司鑄宣德通寶錢英宗正統初收賦
有米麥折銀之令遂減諸納鈔者而以米銀錢當鈔弛
用銀之禁朝野率皆用銀其小者乃用錢惟折官俸用
鈔鈔壅不行

代宗景泰四年令民間將銅錢折鈔阻壞鈔法者論如律

天順四年令

民間除假錢錫錢外凡歷代并洪武永樂宣德銅錢及折二當三依數准使憲宗成化三年令內外課程俱錢鈔中半兼收如應納一貫者止納鈔一貫不在兼收之例十七年令京師內外止許行歷代及洪武永樂宣德舊錢每錢八文折銀一分八文折銀一錢不得以私造新錢攬入阻壞錢法孝宗弘治元年詔稅課司順天山東河南戶口食鹽俱收鈔各鈔關錢鈔兼收其後改折用銀洪武永樂宣德錢積不用詔發之令與歷代錢

兼用

戶部請鼓鑄乃復開局鑄錢

凡納贖收稅歷代錢制錢各收其

半無制錢即收舊錢二以當一

時制錢七百當銀一兩

其後私錢

盛行楮鈔壅滯大學士邱濬言臣按金銀之屬細分之則耗布帛之屬片析之則廢惟鑄銅為錢物多則予之以多物少則予之以少惟所用而得焉且金銀出於天幣帛成於人錢也者合天人以成其器銅天生者也而成錢則人為之矣自古論錢法者惟南齊孔顗所謂不惜銅不愛工二語者萬世不易之良法也體質厚而肉

好適均製作工而輪廓周正本多而工費雖驅之使鑄彼亦不為矣况冒禁而盜為之哉然自太府圜法以來以銅為泉或為半兩或為榆莢或為八銖或為四銖惟漢之五銖為得其中五銖之後或為赤仄或為當千或為鵝眼綖環或為荷葉惟唐之開元為得其中二者之外或以一當三以一當十以一當百然皆行之不久而遽變惟其質製如開元者則至今通行焉惜古鑄之存世者無幾凡市肆流行而通使者皆盜鑄之偽物耳銷

古為今廢真售偽滔滔者然莫如之何為今之計莫若
拘盜鑄之徒以為工收新造之錢以為銅本孔顗此說
別為一種新錢以新天下之耳目革天下之宿弊利天
下之人民每錢以十分為重中間錢文必以古篆或用
年號別製佳名其面上加識以楷書二字上皇下明輪
廓之旁周迴鑿以花紋每文計用銅十五分又令天下
輸舊錢於官以易新錢所得舊錢週以細紋如新錢製
式然後散之天下仍詔非此二樣錢勿用則錢法流通

而公私俱便矣又曰本朝制銅錢寶鈔相兼行使然錢之弊在於偽鈔之弊在於多請稽古三幣之法以銀為上幣錢為中幣鈔為下幣以中下二幣為公私通用之具而一準上幣以權之焉蓋自國初以來有銀禁恐其或闕錢鈔也而錢之用不出於閩廣宣德正統以後錢始用於西北自天順成化以來鈔之用益微矣必欲如寶鈔屬錮之刑每一貫準錢一千銀一兩以復初製之舊必不可也今莫若銀與錢鈔相權而行每銀一分易

錢十文新製之鈔每貫易錢十文四角完全未中折者
每貫易錢五文中折者三文昏爛而有一貫字者一文
通詔天下以為定制而嚴立擅自加減之罪則銀與錢
鈔交易之數一定而永不易矣十六年鑄弘治通寶

每文

重錢二分

武宗正德初司鑄庫太監龐瑄言自弘治間榷關

折銀入承運庫錢鈔缺乏支放不給請遵成化舊制錢
鈔兼收從之三年以太倉積錢給官俸十分為率錢一
銀九又從太監張永言發天財庫及戶部布政司庫錢

開給徵收每七十文徵銀一錢且申私鑄之禁七年令
稅課俱收舊錢與國朝銅錢相兼行用世宗嘉靖四年
令宣課分司收稅鈔一貫折銀三釐錢七文折銀一分
是時鈔久不行錢亦大壅六年大鑄嘉靖錢每文重一
錢三分且補鑄累朝未鑄者南京吏部司務朱希舉奏
稱戶工二部請開納銀入監開礦煎銀不若採銅鑄錢
下戶部議尚書梁材奏曰兩京見有寶源局設官鑄錢
良法美意固未嘗費至於嚴禁偽錢使歷代好錢與制

錢法兼行使具在律令及出榜禁約至再至三并天下
戶口食鹽每月進納本色錢鈔俱用制錢及歷代好錢
送廣惠庫交收聽候光祿太常二寺開領貿易疏通錢
法具在但法久弊生盜鑄輒起緝捕一懈偽錢四行若
不痛加嚴治何以屏息姦頑及查嘉靖制錢尚有一萬
四千五百七十九萬九千三百六十文未曾補鑄通合
議處欲候命下戶部移咨兩京工部將未鑄嘉靖制錢
一萬四千五百七十九萬九千三百六十文工部監造

九千七百一十九萬九千五百七十三文南京工部監
造四千八百五十九萬九千七百八十七文俱送太倉
銀庫交收以備給商等項支用及咨都察院并天下巡
按御史申明禁約不拘洪武永樂宣德弘治嘉靖通寶
及歷代制錢相兼行使每好錢七十文准銀一錢皮混
低錢以二折一若有藏蓄私鑄小錢許赴所在官司首
出照依鉛錫時價動支官銀給領仍免其罪違者論如
律從之十九年以鑄錢所得不償所費暫行停止三十

二年令照新式鑄洪武至正德紀元九號錢每號一百萬錠每錠五千文嘉靖錢一千萬錠內工部六分南京工部四分若分鑄稅課抽分諸廠專收嘉靖錢民患錢少乃發內庫新舊錢八千一百萬文折給俸糧又令通行歷代錢有銷新舊錢及以銅造像製器者罪比盜鑄先是民間行濫惡錢率以三四十錢當銀一分後益雜鉛錫薄劣無形製至以六七十文當銀一分後摺夾其中不可辨用給事中李用敬言以制錢與前代雜錢相兼行上品者俱七文當銀一分視錢高下為三等下者二十一文當銀一分私造濫惡錢悉禁不行時小錢行久民頗不便四十三年以私鑄盛

行錢法阻滯大學士徐階奏連日錢法雖稱已通然其實僅通十分之五臣等訪求弊源非民之梗法實局鑄造制錢之不如法有以致之也蓋制錢之解自南京者其背或以金塗之謂之金背或以火熏其背使黑謂之火漆其雲南所解及寶源局先年所鑄純用銅錫不攪以鉛每錢一文重一錢二分錢邊皆鏃其色黃美其質堅重其邊圓整謂之鏃邊近年局中所鑄革去車鏃止用鑄剡二匠工匠又侵盜銅料色雜質輕其邊剡磨麓

糙謂之一條棍鏃邊工料重大不利私鑄一條棍者工費輕省私鑄盛行且一條棍與私鑄之錢相似而難辨民間不肯行使并將金背等項亦皆不行前日依法禁治而無藉之徒乘機以假錢脇制接受於是民間閉門罷市官司只得令使金背等錢而於一條棍等從其便夫錢曰金背火漆鏃邊一條棍蓋四名矣然其實寶源局所鑄一條棍之數多而南京所解金背之數少故今所通僅得十分之五也臣竊謂一條棍既已不能強民

行使若寶源局仍鑄不已有五害焉戶工二部每年以二萬八千有用之銀投諸無用之地一也中奸猾之計開私鑄之門二也朝廷以此賞中外之人彼賞者得錢而無用三也官府給與民商有虧抑之怨四也錢法因之阻滯禁治之令不行虧損國體五也不若令工部停止寶源之鑄造而令戶部以南京雲南所解及稅課司所收金背等錢每年鑄一千萬文送司鑰庫備賞賜之用部中合給錢者則以鑄錢之銀代給則銀不虛費錢

不乏用奸弊革而私鑄止矣從之四十四年寶源局鑄嘉靖錢行於市後因鑄邊勞費以鑄濫代之而鑄工競用鉛錫以便剽奸徒盜鑄并金背亦不售後部議止勿

鑄公費惟用白銀

先是御史何廷鈺請許民用小錢以六十文當銀一分又嘉靖錢七文洪

武諸錢十文前代錢三十文當銀一分然濫惡小錢雖奉旨間行竟不復用而民間競鑄嘉靖通寶錢與官錢並行焉後給事中殷正茂請採雲南銅鑄錢工本銀三十萬萬可得錢六萬五千萬文直銀九十三萬餘兩足以稍助國家之急數年巡按王諍言宣課司收稅以七文當一分奸民乘機阻撓錢多則惡濫相欺錢少則增值望利自今準折聽民便不必定文數而課稅及官俸俱用銀乃罷雲南鑄錢于是階陳五害帝乃鞠治工匠

侵料減工罪而停鼓鑄自後歲課徵銀而不徵錢民間止有制錢不用古錢而私鑄者多穆宗隆慶

初錢法不行兵部侍郎譚綸言欲富民必重粟帛而賤

銀欲賤銀必置錢法以濟銀之不足今錢惟布於下而

不以輸上故其權在市井請令民得以錢輸官則錢法

自通於是課稅銀三兩以下復收錢

時錢八文折銀一分

高拱再

相言錢法朝議夕更迄無成說小民恐今日得錢而明

日不用是以愈更愈亂請勿多為制亂人耳目帝深然

之錢法復通

時實鈔不用垂百餘年惟俵錢支鈔如是故四年始議新鑄隆慶錢給京官俵

時巡撫山西都御史靳學顏上書議鑄錢曰臣聞人之
所由生衣食為大王者利用厚生必先乎此此出於天
時地利人力相待而共成三才之用者也有此三才即
有此布帛五穀增虧相乘有無相貿而非有水旱之災
兵革之奪癘疫之妨以一歲之功而供一年之用也今
民愁居懾處司計者日夜憂煩遑遑以匱乏為慮者豈
布帛五穀之不足哉謂銀不足耳夫銀者寒不可衣饑
不可食不過貿遷以通衣食之用爾而銅錢亦貿遷以

通用與銀異質而通神者猶雲南不用錢而用海巴三
者不同而致用一焉今獨奈何用銀而廢錢惟時天下
用錢者曾不什一而錢法久矣其不舉矣錢益廢則銀
益獨行銀獨行則豪右之藏益深而銀益貴銀貴則僞
益賤而折色之辨益難而豪右者又乘其賤而收之時
則貴而糶之銀之積在豪右者愈厚而銀之行於天下
者愈少再踰數年臣不知其又何如也則錢法不行之
故爾計者又欲開礦夫礦不可開開無益也一禁而不

可弛弛則亂矣臣試根極錢說而司計者擇焉臣聞錢者泉也如水之行地中不得一日廢者從成周漢唐宋以來史籍可覩未有用銀廢錢如今日之甚者也而用錢之多鑄錢之盛者尤莫如宋故宋太祖欲集錢至五百萬而贖山後諸郡於遼靖康中趙良嗣奉使歲加稅銀一百萬餘金其平時賂契丹寧夏也歲幣率有常額其外國亦用錢可知又宋之饒州處州江寧等處皆其鼓鑄之地今江南人家嘗有發地得窖錢者則無南北

皆用錢可知其餘書史所嘗言幾百萬無慮鉅萬累鉅萬之說率多以錢計今去宋不遠故所用錢多宋之物夫用錢則民生日裕鑄錢則國用益饒惟人主得為之故曰聖人之大寶曰位因位而制權因權而制用故又曰錢者權也一代之興則制之一主之立則制之改元則制之軍國不足則制之此經國足用之一大政也奈何廢而不舉臣竊聞江南富室有積銀至數十萬兩者今皇上天府之積亦不過百萬兩以上若使銀獨行而

錢遂廢焉是不過數十里富室之積足相擬矣皇上試一舉其權而振之則彼富室者知勇豪俊者將奔走於吾權之不暇彼敢冒萬死而盜鑄一文者哉故曰權也權者立之無形而達之無窮用之則天下求我而有餘不用則日擾擾焉求天下而不足為驗甚明也且夫富貴其權一也皇上今出數寸之符移片紙之檄以匹夫而拜將相焉又能使同姓王異姓侯焉於公帑未有損也此馭貴之權若是乎其易也若乃今日與人以千金

焉明日與人以萬金焉曾不踰年而太倉告匱矣夫何
馭富之權若是乎其不侔與誠以有權而不用與無權
等爾昔漢文帝寵鄧通也曰吾能富之賜以蜀山之銅
而鄧氏之錢滿天下吳王濞擅鑄山之利而輒稱兵與
漢廷抗夫以竊一日之權尚足以得民而抗漢況以萬
乘以自振其權可勝用哉今之為計者謂錢法之難有
二一曰利不酬本所費多而所得鮮矣臣愚以為此取
效於旦夕計本利於出入蓋民間之算非天府之算也

夫天府之算以山海之產為材以億兆之力為工以修潔英達之士為役果何本而何利哉此所謂本猶不免用銀之說爾臣所謂本蓋無形之權是已何則鑄錢之須一曰銅料一曰炭一曰轉致一曰人工夫此四者在民間之計銀一分而得錢四分誠不酬五矣自臣愚計之皆可不用銀而取辦者誠將天下出產銅料之處贖軍徒以下之罪而定其則以收銅於西山產煤之窯以法司有罪之人而准其罪以納炭其運炭則請出府庫

見有之錢或於京城或於近縣或於營軍如係官身則
量給以工食如係民戶則平給以脚價如是而患無材
與夫轉致之難臣不信也至於人工取之見役而皆足
則又不煩銀兩而可辦也臣不知工部及寶源局額匠
役若干見今坐食否耶即以營軍九萬人論之抽用其
一二十人足矣而謂妨訓練耶今京城之內鍛金刺繡
聲技力作之徒與夫靠衙門而衣食者孰非營軍奚啻
二千也而未嘗患其妨凡此皆不用銀而可以成務固

無本利之足較矣其二曰民不願行強之恐物情之沸騰也臣愚以為歷代無不可之至稱為錢神我朝又用之祇見其利不聞其病正德嘉靖以前猶盛行之蓋五六百而值一兩今七八十歲人固多尚可一名而訊也獨至於今屢行而屢廢甫行而輒輟焉何哉臣竊詳之錢比鈔異於小民無不利也獨所不便者奸豪耳一曰盜不便一曰官為奸弊不便一曰商賈持挾不便一曰豪家蓋藏不便此數不便者與小民無與也臣竊聞往

時但一行錢法則輒張告示戒嚴衛不先於賣菜之傭則責之以荷擔之役愚而相煽既閉匿觀望之不免而奸豪右族依托城社者又從旁簧鼓之以濟其不便之私一日而下令二日而閉匿不三四日而中阻矣務大計者宜若是之易動哉臣聞施恩澤者自無告始行法令者自貴近始豈惟貴近自朝廷始可也請自今以後追抵贖者除折穀外而責之以納錢上事例者除二分納銀外而一分以納錢存留戶口則兼收錢穀商稅課

程則純用收錢此謂自朝廷始又因而賜予之費宗室之祿百官之俸則銀錢兼支又因而驛遞應付雇夫雇馬則惟錢是用又因而軍旅之餉則分其主客量其遠近或以代花布或以充折色此謂自貴近始矣此數者有出有入而民間無底滯之患誠以上下交會血脈流通故也輕斂輕散官府有餘積之藏誠以正賦之銀既以無減於常額而一切之費又取辦於一權故也此權不可通之於天下以啟盜權之釁請於寶源局或西倉

專設侍郎或即用左右侍郎一員督於上以十三司員外或主事分理十三省事於下以科道各一員監之銅料工材各有攸掌各省歛散悉照分司先以區畫條議計定而行而又輕重適均無駭於俗仍唐宋以來舊錢兼之或上施下或下納上著之以必行之令遲之以歲月之效久之而本末兼利公私循環可以輟鼓鑄之勞而罷工作之使也昔我祖宗先制鈔時下令甚嚴有以金銀貨物交易者輒沒給告者然不徒責之下也後又

令各處稅糧課程贓罪俱折收鈔此固血脈流通之意
所謂泉也而法以佐之所謂權也神宗萬厯四年命戶
工二部准嘉靖錢式鑄萬厯通寶錢金背及火漆錢一
文重一錢二分五釐又鑄錠邊錢一文重一錢三分頒
行天下俸糧兼給銀錢後神宗宮費稍侈令工部鑄錢
給用大學士張居正疏曰按工部議製錢二萬錠該錢
一萬萬文用工本銀十四萬九千兩大半太倉銀庫此
奉旨鑄錢之大略也臣等伏見先朝鑄造制錢原以通

幣使民鑄成之後諒進少許呈樣非所以進供上用者
也萬厯二年鑄造之初亦止進樣錢一千萬文其後以
一半通用已非進幣便民之本意今若以實用闕錢徑
行鑄造通用則是以外府之儲取充內庫大失舊制矣
且京師民間嘉靖錢最多自鑄萬厯錢後愚民訛為止
行新錢不行舊錢甚以為苦今若廣鑄新錢則嘉靖舊
錢必至阻滯不行於民甚為不便又與原奉聖旨與嘉
靖隆慶等錢兼行之意相背伏望暫停鑄造從之六年

定嘉靖隆慶萬厯制錢每金背八文準銀一分火漆錠
邊各十文準銀一分洪武等錢與古錢十二文準銀一
分十年詔暫停各處錢局俟錢法疏通聽鼓鑄十三年
鑄萬厯通寶錢十五萬錠南京工部分鑄六萬錠十四
年湖廣撫臣奏武荊衡三局所鑄各限一式民間俱不
通用武局者不能行之荊州衡局者不能行之武昌請
今後不得妄分新舊揀擇彼此按萬厯中雲南巡按郭庭梧言國初京師有寶
源局各省有寶泉局至嘉靖間省局停廢滇中產銅不
行鼓鑄而反以重價購海肥非利也遂開局鑄錢尋命

十三布政司皆開局以五銖錢為準用四火黃銅鑄金背二火黃銅鑄火漆蓋以費多利少私鑄自息也久之戶部言錢之輕重不常輕則缺重則散故無鑄關匱乏之患初鑄時金背十文折銀一分今萬厯金背五文嘉靖金背四文折銀一分火漆錢邊亦如之使踰十年而輕重不啻相半宜發庫貯以平其直從之

熹宗

天啟元年鑄泰昌錢兵部尚書王象乾請鑄當十當百當千三等大錢略倣白金三品之制後有言大錢之弊者詔停鑄莊烈帝崇禎三年御史饒京言鑄錢開局本通行天下今苦於無息旋開旋罷各局所鑄之息不盡歸朝廷復苦無鑄本蓋以買銅而非採銅也乞遵洪武

初及永樂九年嘉靖六年例遣官各省鑄錢採銅於產銅之地倣銀礦法十取其三銅山之利朝廷擅之小民所採仍予以直從之已而荊州主事朱大受專督鑄錢定錢式每文重一錢每千直銀一兩南都錢輕薄乃定每文重八分初嘉靖錢最重隆萬錢加重半銖自啟禎新鑄出舊錢悉棄置然日以惡薄末年勅鑄當五錢竟未及行史臣曰明制歷代錢與制錢通行自神宗初從僉都御史龐尚鵬議古錢止許行民間輸稅贖罪俱用

制錢啟禎時廣鑄錢始括古錢以充廢銅民間市易亦
擯不用矣莊烈帝初即位御平臺召對給事中黃承昊
疏有銷古錢之語大學士劉鴻訓言北方皆用古錢若
驟廢之於民不便帝以為然既而以御史王爕言收銷
舊錢但行新錢於是古錢銷毀頓盡蓋自隋時盡銷古
錢至是凡再見之鈔法自弘正間廢天啟時給事中惠
世揚復請造行崇禎末有蔣臣者申其說擢為戶部司
務倪元璐方掌部事力主之然終不可行而止

欽定續通典卷十三